

天津圖書館藏

紀曉嵐
刪定

《四庫全書總目》稿本

國家圖書館出版社

7



天津圖書館藏

紀曉嵐
刪定

《四庫全書總目》稿本

國家圖書館出版社

7

欽定四庫全書總目卷一百六十一

集部十四

別集類十四

石屏集五卷

浙江鮑士
恭家藏本

宋戴復古撰復古字式之天台人嘗登陸游之門以詩鳴江湖間所居有石屏山因以為號遂以名集卷首載其父敏詩十首蓋復古幼孤勉承家學因搜訪其先人遺稿以冠己集昔黃庭堅山谷集後附刻其父伐檀詩王楙野客叢書後附刻其父

野老紀聞復古以父詩為數無多不成卷帙特
升弁於簡端例雖小變理乃較協矣復古詩
筆俊爽極為作者所推姚鏞跋其詩稱其天然不
費斧鑿處大似高三十五輩晚唐諸子當讓一面
方回跋其詩亦稱其清健輕快自成一家雖皆不
免稍過其實要其精思研刻實自能獨闢町畦瞿
佑歸田詩話載復古嘗見夕照映山得句云夕陽
山外山自以為奇欲以塵世夢中夢對之而不愜
意後行村中春雨方霽行潦縱橫得春水渡傍渡

句以對上下始稱其苦心搜索即此可見一端至
集中嚴子陵釣臺詩所作平生誤識劉文叔惹起
虛名滿世間者趙與虢娛書堂詩詒極賞其新意
可喜而羅大經鶴林玉露又深以其議論為不然
蓋意取翻新轉致失之輕佻集中殊非上乘與虢
所云固未足為定評矣

蓮峯集十卷

永樂大典本

宋史堯弼撰堯弼字唐英眉州人其仕履不見于
史傳焦竑國史經籍志載堯弼蓮峯集三十卷而

世間亦無傳本。故錄宋詩者多不能舉其姓名。惟永樂大典載有是集原序二篇。其一作于乾道丙戌。自署曰省齋。不知何人。其一為任清全序。作於嘉定癸酉。稱堯弼童丱。即迥出不凡。少以古樂府。洪範等論。往見張浚。浚謂其大類東坡。留館于潭。與張栻遊。每開以正大之學。歲丁丑。偕其弟堯文登第。云云。而亦不言其所終。考周密浩然齋雅談云。李燾十八歲為眉州解魁。時第二人史堯弼。方十四歲。人疑其文未工。赴鹿鳴宴。猶着粉紅袴。

命分韻賦詩。堯弼得建字。援筆立成。云四歲尚少。房元齡七步未饒。曹子建後為張魏公客。不幸早世云云。其所記與任清全序相合。又江湖續集載張煒題蓮峯集詩一首。亦有句云。一梗江湖客。三朝忠義家。以諸書參互考證。蓋堯弼登第後。未授官而卒也。堯弼天姿卓絕。其詩縱橫排宕。擺脫恒蹊。其論策諸篇。明白曉暢。瀾翻不窮。亦有不可羈勒之氣。大抵有其鄉蘇氏之遺風。惟其夏綠霜凋。故不能如李燾之著書傳後。然就其文章而論。要

亦不失為才士。任清全序乃因集中有論學之作。遂以張栻少年自得為堯弼磨礪浸灌之功。欲援而入于道學。列則門戶標榜之習。轉不足以見堯弼矣。其文在宋已多散落。是集乃其從孫師道所重刻。今亦不可復覩。謹從永樂大典中掇拾裒輯。釐為十卷。著之於錄。俾懷才賣志之士。無聲塵翳。遂如之慨焉。

江湖長翁文集四十卷

山東巡撫
採進本

宋陳造撰。造字唐卿。高郵人。淳熙二年進士。官至

淮南西路安撫司叅議。遭宋不競。事多齟齬。自以
為無補於世。置江湖乃宜。遂號江湖長翁。既不竟
其用。故無所表見。而宋史亦不為立傳。惟元中屠
駟為作墓誌。稱其於誨誘則良師。於撫字則循吏。
身篤操修。道兼體用。雖金石之文。稱述例多濫量。
亦未必純構虛詞也。集中罪言一篇。蓋仿杜牧而
作。不免紙上談兵。徒為豪語。其文則恢竒排奡。要
亦陳亮劉過之流。其他劄子諸篇。多剴切敷陳。當
於事理。記序各體。錘字鍊詞。稍傷真氣。而皆謹嚴。

有法○失規○程在南宋諸作者中亦鐵中錚錚者矣。至易說一卷始於无妄終於比凡十五篇疑其未完之書中多以史證經與楊萬里誠齋易說李光讀易詳說相類殆為時事而發托之詁經歟其集久無刻本明崇禎中李之藻以淮南自秦觀而後惟造有名於時始與觀集同刻之於高郵云

燭湖集二十卷附編二卷

永樂大典本

宋孫應時撰。應時字季和自號燭湖居士。餘姚人。登淳熙乙未進士。初尉黃巖。遷海陵丞。再遷遂安。

令改知常熟縣以倉粟流欠貶秩移判邵武軍未
上而卒考楊簡作應時壙志及張湜會稽續志均
稱其紹熙初嘗應蜀帥邱壘辟預料吳曦逆謀白
壘以別將領其軍後曦以叛誅其言果驗時應時
已歿三省奏官其子祖開蓋亦智畧之士又史彌
遠受業於應時集中與彌遠諸書皆深相規戒迨
彌遠柄國獨超然自遠無所假借甘淪一倖而終
其人品尤不可及矣宋史藝文志載燭湖集十卷
據應時詩中自序蓋嘗應劉克莊之求手編其稿

為五十卷。集末有其侄祖祐跋。稱涑水司馬述先
以十卷付梓。後付以問思錄五十條。通鑑摘義三
十條。總名之曰經史說。又附雪齋父子倡和詩。及
雪齋行狀墓銘。楊簡所撰壙記。會稽續志小傳。子
祖開補官省劄等篇。是十卷為祖祐所編。非其舊
本也。年遠散佚。久無傳本。故厲鶚作宋詩紀事。僅
於吳禮部詩話。王應麟困學紀聞。黃宗義姚江逸
詩內採掇數篇。寥寥不備。茲從永樂大典所載。排
纂成編。惟經史說殘缺特甚。僅存一篇。其餘則約

畧篇數殆已十得八九以卷帙繁重分二十卷仍附編其父介及其兄應求應符詩並錄應時父子誌傳行狀子祖開補官省劄諸篇為上下二卷應求字伯起嘗登鄉薦應符字仲潛所著有歷代帝王纂要二卷初學須知五卷載於陳振孫書錄解題今並未見云

昌谷集二十二卷

永樂大典本

宋曹彥約撰彥約有經幄管見已著錄是編稱昌谷集者考集中有與劉後溪書謂世為都昌村落

人後遷于城下昌谷巷則其所居地名也彦約初游朱子之門其後歷任州郡却敵平寇獨卓有實用故宋史本傳稱其可以建立事功及入侍講筵亦能殫心啟沃其經幄管見一書敷陳祖訓規箴時政尚歷歷可稽惟文集湮沒不顯宋史藝文志皆不著錄惟焦竑國史經籍志有昌谷小集二十卷錢溥祕閣書目亦有曹文簡公集十五冊然亦久無傳本屬鷄宋詩紀事蒐羅繁富絕不及其姓名則無徵久矣今惟永樂大典尚頗載彥約詩文

核其篇目。如本傳所稱為利路轉運判官時所作
病夫議。為兵部侍郎時所上薦李心傳劄子。俱不
載其中。知已未免於佚缺。然其餘諸作。世所不傳
者。為數尚夥。謹類次排纂。釐為二十二卷。其間奏
議。大都通達政體。可見施行。所論兵事利害。尤確
鑿有識。不同摭拾。游談。其應詔陳言二封事。乃
慶元寶慶間先後所上。于當日苟且玩愒之弊。反
覆致意。切中竅要。亦可徵其鯁直之槩。惟儷詞韻
語。稍傷質樸。然不事修飾。而自能詞達理明。要非

學有原本者不能也。

省齋集十卷

永樂大典本

宋廖行之撰。行之字天民。其先延平人。五季時徙於衡州。登淳熙甲辰進士。嘗官岳州巴陵尉。以親老丐養而歸。注授寧鄉主簿。未赴。據田奇所作行狀。稱其生平內行修飭。留心經濟。入仕亦多著循績。然名位不昌。故姓字不著于史傳。其所著作諸家亦罕著錄。是集乃其子謙所刊。原本十卷。今從永樂大典中採掇。裒輯篇帙頗夥。似當日全部收

入謹排次審訂。仍析為十卷以還其舊。其原跋十七通。行狀墓銘等三首。仍附於後。以備考核。其文章大抵屏除藻繪。務以質樸為宗。或不免近於朴儻。故戴溪作序。不甚稱之。然其詞意篤實。切近事理。亦足以想見其為人。至其四六之作。則較他文為流麗。潛敷敬跋。稱其表啓多互見。周必大集中。蓋以必大亦有省齋之名。故相淆混。今檢勘必大全集。實無一篇與此相複。當由後人知其誤載。從而刊除矣。